



Selasa, 01 Desember 2020

Ogen: Jeremia 38:14-28



Ngaloken Kata Ajar



Man kalak si enggo mbelin maka lit paksana labo mesunah iakapna ngaloken ajar entah pedah i bas kalak si deban nari. Si enda jadi erkiteken enggo lit tersuan i bas ukurna erbage pendapat ras pilihan-pilihan si deban si banci la seri ras pedah ajar si isehken man bana paksa e. Kecibal si bagenda inanami Raja Sedekia tupung jaman Jeremia erdahin. Selain Jeremia lit penasihat raja sideban eme Nabi Hanania si kata persinget si isehkenna ertolak belakang ras pedah ajar si ituriken Jeremia. Adi Nabi Hanania uga maka senang ukur raja bage rusur iturikenna. Labo ia perlu kai berita i bas Dibata nari. I bas dampar si deban pedah si isehken Jeremia rehna i bas Dibata nari, la ikurangi ntah itambahina, senang ntah lang raja sipasti, sora kenabianna isehkenna. Emaka rubat i bas ukur Raja Sedekia ertimbang kerna kerina pedah ajar kerina si seh man bana. Enda me maun tantangannta selaku kalak si enggo dewasa. Sada dampar erguna tuhu kerina pengalamen kegeluhenta. Enggo erbage si idah perbandingan-perbandingan. Enggo erbage si idah uga kalak si deban, uga kuta si deban. Tapi i bas dampar si deban banci mulihi mesera si iakap muat keputusan apai si mehulina. Apai ka selaku raja, simehuli la man bana saja ngenca perlu iukurina tapi man rayatna sinterem. Kai pe pilihan ras keputusenna e, mbelin kal mpengaruhi geluh bangsa sinterem. Sada kelemahen Raja Sedekia la terbedakenca apai ajar si rehna i bas Dibata nari. Si enda erkiteken hubungenna ras Dibata lanai mehuli emaka enggo samar-samar man bana nandai sora Dibata. Kita paksa genduari pe adi si begi Kata Dibata si mereken ajar man banta, ula pemersik ukurta amin gia sekali ajar e pagit ngalokenca tapi pagit gia enda me kari si pepalem pinakit pusuhta.